

Broj:  
Sarajevo, 30. 7. 2019.

**Javno reagiranje povodom emitiranja filma  
*Tužilac, branilac, otac i sin***

Programski savjet / Uredničko vijeće TVSA najoštrije osuđuje emitiranje filma *Tužilac, branilac, otac i sin* u programu TVSA dana 11. jula 2019. godine, na godišnjicu obilježavanja genocida koji su snage Vojske i policije RS počinile 1995. godine u Srebrenici.

Ovim filmom grubo je relativizirana historijski i sudski utvrđena istina o genocidu u Srebrenici, te je emitiranje ovakvog filma, posebno na dan sjećanja na žrtve genocida, najdirektniji atak na nedvojbenu istinu o srebreničkom genocidu, kao i jednako direktan prilog brojnim nastojanjima da se negira stvarna istina o genocidu počinjenom u Srebrenici i okolini u julu 1995. godine. Emitiranje ovog filma predstavlja i direktnu uvredu za sve žrtve genocida i njihove porodice, kao i sve druge žrtve Agresije na Bosnu i Hercegovinu, ali i uvredu za cijeli civilizirani svijet koji priznaje realne činjenice o srebreničkom genocidu.

Ističemo da Programski savjet nije bio upoznat s planom da će se sporni film emitirati u programu TVSA, pa samim tim nije niti bi dao saglasnost za njegovo emitiranje. Naime, odobravajući programsku shemu za mjesec juli 2019. godine, na sjednici održanoj 28. juna 2019. godine, Programski savjet dao je saglasnost za emitiranje posve drugog filma – *U potrazi za domom* autora Harija Šečića, koji je svojom tematikom bio znatno prikladniji za emitiranje na dan obilježavanja genocida u Srebrenici. Također, uprkos našim nastojanjima, Programski savjet do danas nije dobio zvanične informacije na temelju koje i čije odluke je sporni film emitiran u programu TVSA, iako je to naše statutarno pravo. Osim toga, u više navrata upozoravali smo i na problem statutarne nadležnosti u uređivanju programskih sadržaja TVSA, te smo s ciljem rješavanja ovog problema zahtijevali i sastanak s v. d. direktoricom TVSA gđom Kristinom Ljevak, koji, međutim, v. d. direktorica nije organizirala niti se na bilo koji drugi način oglasila povodom zahtjeva Programskog savjeta.

Nakon emitiranja spornog filma u javnosti su se javili i rukovodstvu TVSA pristigli su brojni prigovori i osude zbog emitiranja spornog filma, a između ostalih i zahtjev za javno izvinjenje upućen sa strane Udruženja „Pokret Majke enklave Srebrenica i Žepa“ i Udruženja žrtava i svjedoka genocida. Ovaj zahtjev u cijelosti podržava i Programski savjet, pri čemu dodatno zahtijeva i utvrđivanje odgovornosti za emitiranje spornog filma i sankcioniranje odgovornih, odnosno da se utvrdi na temelju koje i čije odluke je odobreno emitiranje spornog filma, bez znanja i saglasnosti Programskog savjeta i glavne urednice programa TVSA gđe Amele Hubijar-Hatić, a prije stupanja na dužnost izvršnog direktora programa i produkcije gosp. Harisa Dučića, koji je ovu funkciju preuzeo 17. jula tekuće godine, tj. nakon emitiranja spornog filma.

U interesu cjelokupne javnosti i u skladu sa svojim statutarne nadležnostima, Programski savjet strajat će na rješavanju ovog problema i insistirati na društveno odgovornom i profesionalnom radu TVSA, kao i svaki put dosad.

Programski savjet / Uredničko vijeće TVSA

Dostaviti:

1. Svim medijima
2. Rukovodstvu i uredništvu TVSA
3. A/a